



Sesida dals

Communitgà ils

Protocol nr.

20 d'avust 2019

23 d'avust 2019

586

Incumbensa da la fracziun da la PCD

concernent la distgargia fiscala per la classa mesauna tras in augment da las deducziuns per premias d'assicuranza

Resposta da la regenza

L'incumbensa da la fracziun parta d'ina vart dal fatg che la situaziun finanziaria dal chantun saja fitg buna e che las persunas natiralas, en spezial la classa mesauna, n'hajan senti nagut da las distgargias fiscalas d'enfin ussa. Da l'autra vart s'augmentan las premias da las cassas da malsauns d'in cuntin e na sajan betg pli pajablas per bleras famiglias ed en spezial per persunas ch'educheschan sulettas.

La situaziun da partenza descritta sto vegnir relativada per part. I constat ch'il chantun ha finanzas saunas. Tras l'augment pretendì da la deducziun d'assicuranza resultassan però en il futur entradas pli pitschnas. Las perspectives financialas per il futur sa preschantan dentant bler mender. Ils ultims onns n'han ultra da quai betg mo las persunas giuridicas pudì profitar da distgargias fiscalas. Er las persunas natiralas èn vegnidas distgargiadas considerablain, perquai che las deducziuns per uffants e la deducziun d'assicuranza èn vegnidas augmentadas sco er perquai che la deducziun per la tgira d'uffants è vegnida introducida ed augmentada. Plinavant è la gulivaziun da la progressiun freida vegnida concedida gia en cas d'ina chareschia da trais puncts procentuals. Quai ha chaschunà – gist per l'onn fiscal 2019 – in'adattaziun da l'index e pervia da quai distgargias per las persunas natiralas da var 12 milliuns francs. Ultra da quai stoi vegnir accentuà ch'il chantun Grischun è fitg progressiv en il sector da la reducziun individuala da las premias (RIP) e che persunas en relaziuns economicas modestas vegnan distgargiadas en moda generusa.

Cumpareglià cun differents chantuns ha il Grischun – ultra dal chantun Tessin – gia oz las deducziuns d'assicuranza las pli autas. En questas cifras è gia cuntegnì l'augment da las deducziuns, che vegn realisà u che duai vegnir realisà cun l'entrada en vigur da la RFFA.

Chantun	Persunas maridadas	Persunas che vivan sulettas	Uffants
Confederaziun	3500	1700	700
AG	4000	2000	0
AI	5800	2900	600
AR	4000	2000	1000
GL	6000	3000	1000
GR*	8700	4400	1200
SG	6400	3200	1000
SH	3500	1700	300
TG	7000	3500	1000
TI	10 500	5200	0
VS	6000	3000	1000
ZH	5200	2600	1300

* Las deducziuns per il Grischun sa basan sin in stadi da l'index da 103 %.

La cumparegliaziun da las premias da las cassas da malsauns cun quests chantuns mussa ch'in augment da la deducziun na para betg necessari. Da resguardar vali er che l'augment pretendì avess per consequenza ch'il Grischun concediss deducziuns circa duas giadas uschè autas sco quellas dal chantun Turtig. Dal puntg da vista da la gulivaziun da finanzas interchantunala chattass quai pauca accoglientscha.

Da l'augment pretendì da las deducziuns resultassan perditas da var 5,3 milliuns francs per il chantun, da 4,8 milliuns francs per las vischnancas e da 530 000 francs per las baselgias. Questas perditas ston vegnir consideradas er en connex cun las mesiras da la politica sociala en il rom da la realisaziun da la RFFA, che n'èn però actualmain anc betg fixadas.

Sa basond sin questas consideraziuns propona la regenza al cussegl grond da refusar questa incumbensa.



En num da la Regenza

Il president:

Il chancelier:

Dr. Jon Domenic Parolini

Daniel Spadin